

煙艇永懷序

古今只四倫大抵缺朋友此李宏父先生語也余每誦是言輒不禁唏噓感歎猶庶幾以爲不盡然及余身經患難細閱平生老而賤貧與世齟齬天若深余以苦趣以爲四海交情之鏡而後知宏父之言悲也江河下矣余無媚骨而有宿緣幸而驂脫於嬰金分於鮑眷懷良友豈不醉心獨此鍼芥相投易至河漢昔賢有云朋友之道名其寶重其器洗滌其瑕疵斯爲最大今也鼓邊之鸚鵡不羣隆中之臥龍誰識蓬鬢空華朱絃久冷以

青蠅爲弔客仲翔傷心之語豈欺我哉頃讀龔淵孟先生煙艇永懷是何如蘭斷金之充侈也余有以知其說矣淵孟文心而質行海天澄寂波瀾不生故一時交遊文者貢其春華質者呈其秋實宜其夥矣淵孟不云乎物或無情人必有情以淵孟之情而陶鑄天下之情卽戈矛劔戟皆可爲琴瑟鐘鼓醫經之言曰胃之強者不擇飲食佳惡皆以爲佳病者則否然則余自病胃耳於世間朋友何尤雖然余聞淵孟立身如冰岳其於擇交也至慎卽今永懷傷逝雖西州之痛久而愈新而山陽

之淚原不輕墮無淵孟之慎而泛言鍾情又無以服宏父孩未兩道入之心也

宗禎十年丁丑早秋西楚友弟方震孺書於白門護靜軒

煙艇永懷序

煙艇永懷者海虞龔淵孟先生論交傷逝之所作也先生倜儻性成抗志經世雖在黷序已嶽然屬天下之望一時交遊參其神契皆當世賢豪長者所至以時務相諮訪莫不高其識略倚辦成事而先生亦時時得發舒其志氣以益肆意於經濟大業之間嗟乎豪傑之士能自奮乎儕俗不爲章句帖括所猥瑣而挾其磊珂卓犖之氣戟髯抵掌抗談天下事流俗交口而狂惑之而有心者至結納獎掖引以自輔推轂執鞭若恐不及抑何

激昂而歡多也追身已行爲世用方且指顧一當以酬
知已副同心乃哲萎痍乎憂心西州發其一慟杯闌氣
熱潦倒向誰游從半生語默如昨橫集滿眼縈懷萬端
則悲憤流連不能已已斯亦情至者之深致矣其永懷
所爲作乎集凡三卷彼名世者著其交情肝膽可照卽
二三隱淪筆述所及皆足發潛闡幽而緯蕭之彥緇衲
之遊題目數言其人不死固野乘所謂特筆而交壇可
爲炙史矣此書成於逆璫羅織之後於鉤黨死事諸君
敘致益爲要核足備異日國史採據關係名教之書非

若他人旁行雜著聊以資一時雋永已也符追隨先生
語溪署中出此編相示凡平生有懷而莫卽者披文如
在因得從容進詢其始末不特開拓俯仰備識正人君
子梗概而先生之性情風義亦挹注之無盡傾倒於語
言文字之外矣

句甬通家子陸符文虎撰

煙艇永懷自序

世謂管鮑歿而交道土棄此殆不然物或無情人必有情有情斯有交巨卿之執紼其著者也延陵之挂劍其微者也人既有情物豈無情有交卽有情子猷稱竹曰君竹不以子猷爲知己乎元章呼石曰丈石不以元章爲知己乎彼翻雲覆雨噴沓背憎凡皆不及情而草木之不如者耳立本坎壈當世有腸如絃有口如溜宜乎衆之吐棄之矣乃結髮以來金每斷於同心茹幸逢乎癖嗜情之來不知其所以然情之往亦似不得不然但

煙艇永懷
素心不朽黃髮難期未耄老而哭累世昌黎增感於昔
立本抱痛於今情所攸鍾寤寐耿耿頃因座師范公開
府奉候起居立意遊燕紆途入洛會軍書旁午周道梗
塞空齋兀守傷逝興懷爰尋想曩昔在顯達止述遊踪
在隱淪兼掇行略自非神乎無取形密文不加點事尙
逼真少陵不云乎載讀徐孺碑猶思理煙艇披是籍者
聊以知我思之所繫云爾

崇禎己巳除夕海虞龔立本書於河南撫院之後樂堂

煙艇永懷凡例

一官師以分親長以情皆取莊事者非相知不列
一知交先別省次南直次吳郡總非本邑故曰四方
形跡雖暱其人浮汎者不入

一親朋不分長幼貴賤但以切之年月編次

一此帙成於己巳今歲偶爲簡閱念相知續逝各以
類附

丁丑夏日題於南都之白雲居

煙艇永懷目錄

卷之一

官師親長

贈太僕寺卿前邑宰譚公

贈宮保前邑宰楊忠烈公

南京評事前邑宰詹公

郡丞前教諭李公

大叅前長洲令祁公

少京兆前督學御史過公

學憲前寧國府知府關公

贈太僕寺卿前寧國府推官黃公

文學李公 處士文學二吳公

僉憲管公

贈尚寶司卿前儀制郎諸公

贈宮詹繆公 京衛經歷吳公

諸父靜菴公

附

封僉都御史范太公

卷之二

四方知交

方應祥

童時明

宋鳳翔

沈守正

魏忠節公

鄭圭

江鏜

費貞明 俱浙江

石有恒 湖廣

謝兆申

吳國華

繆仲蘊 俱福建

蔣佳允 廣西

劉時俊 四川

張榜 應天府

仇夢台

汪文言

俱徽州府

湯賓尹

寧國府

王道新

曹履端

俱太平府

左光斗

交慶府

顧端文公

蔣錫疇

尹嘉賓

沈應奎

李應昇

郭勳

俱常州府

朱本淳

陳所聞

俱松江府

徐文任

太倉州

周忠介公

長洲縣

周宗建

吳江縣

鄭允驥

徐允祿

侯震揚

李流芳

俱嘉定縣

趙宦光

山人

洞聞

一看

普門

俱方外

附

徐必達

浙江

徐大相

魏士淳

俱江西

彭遵亮

溧陽

婁堅

嘉定

朱陞宣

蘇州

龔方中

嘉定

姚希孟

文震孟

俱蘇州

毛湛

浙江

卷之三

邑里親朋

周名金

顧耿光

金希閔

王愷

馮覺

趙祖美

琦美

翁愈祥

顧雲鴻

瞿汝稷

邵鏊

沈應科

陳禹謨

何世滋

朱元德

許士廉 時省

瞿純仁

張英

吳汝第

徐待任

瞿汝說

邵昌鋤 濂

范紹祖

陳以敬

范樂善

嚴澂

顧大章

何允泓

王宇春

繆希雍

李允熙

顧應璠

何萼 芾

孫榮祖

附

周炳

盛文琳

瞿式耒

徐化鯉

陳國華

張勉

煙艇永懷卷之一

明常熟龔立本淵孟撰

譚太僕諱昌言字聖俞嘉興人繇萬歷甲午解元辛丑
 進士初除余邑令風采英發文名藉甚及試士人人
 磨厲以須夜半得余卷不勝擊節校閱未竣即定首
 名每覲士大夫誦其文不置余時方坎壈愧不敢當
 無何合郡青衿毆辱郡守當事者橫坐吾邑勒停癸
 卯科公旋調婺源以去予占詠史詩十章贈行孤舟
 泣別邑父老去思彌切爰鐫去思石三字於劔門絕

壁至今存焉其後公丁太公艱補樂城縣量擢南兵
曹余時時造請情誼不減骨肉王子子援例入雍公斥
俸金相助乙卯余舉於鄉公方居太夫人憂登堂稽
首公破涕爲歡己未公車再上公在駕部朝夕過從
已擢八閩學憲音問稍阻未幾遼事孔棘衆推才望
以叅政督兵登萊壬戌春余將詩筭奉候而訃音奄
至余又適遷福安令僅爲位哭比赴閩而閩士子念
公教澤送神主人鬻宮余恰逢其會嗣是余奔家難
小間走奠絮酒則公墓草且宿矣身名落落有負知

已今上登極長君貞默具疏請卹得旨贈公太僕寺
卿錫之葬祭仍蔭一子入監讀書

楊忠烈公諱漣字文孺號大洪應山人下車時余輩迂
於虎邱山下見公丰格聳峭私心異之初政故爲閩
閩崑山諸儀部移書詢公治狀余報之曰撫綏有餘
剛斷不足儀部直而疎竟以札示崑山令令者公同
年也其說遂聞於公人皆爲余惴惴余夷然而已每
旅見公率胸懷抗言利弊左右俱咋舌而公輒側席
傾聽嘗於郡中晤文子文起姚子孟長二兄者語及

余公亟稱曰世固有慷慨男子如若人者哉莅虞垂五年鄉紳竿牘一切杜絕獨余言莫不信從及召入掖垣數貽手書慰勞商略已未報罷公冒風霾見存泣然雪涕其後物望漸隆朝貴干謁者踵錯余至則排闥直抵臥內移宮前數日余除教職言別公出囊資爲余治裘突亥擢僉院還朝余吟一律寄候公自是主持國是而擊璫之疏上傳樞輦相率爲璫鷹犬余偕計入京公且譴歸矣被難時余折腰閩中遙爲飲泣所謂金刀掩銳長淮絕涸慟悼豈一人之私哉

先是南郊有公生祠饒令奉檄毀之棄土像水中直立不腐民以爲神至是余與二三兄弟建議以邑治西偏廢廡爲廟而以繆宮詹顧太僕配享於寢室俾血食世世揚令臚其言而不能用仍葺舊廟祀之諸立朝大節具載國史不述述交誼如此

詹評事諱向善別號明臺常山人癸丑進士莅虞之初余輩於北新關相晤見其寬然長者其知余甚深則太末方孟旋江上繆宮詹之以也余偃蹇名場自顧形穢而每晉謁階墀公輒上客遇之積逋子錢頗爲

緩急後被訾改秩去音問殷殷其謝世未及一唁念之憮然

李郡丞諱維柱字本石京山人以孝廉署余邑教諭性氣忼爽諸生趨承恐後卽觸忤必痛笞之其於脩脯蔑如也余懶慢自若而公敬愛有加熊某督學時息休特甚譴責吳江士子太苛致衆鼓噪而遷怒虞邑余亦在所怒中公侃侃執諍故呈諸生月課以余居首殆人情所難是歲余棄青衿援例入雍謁本寧先生於白下先生曰君標格乃爾無怪叔弟之說項矣

公嘗署敝廬曰旌義名家書法類顏魯公仕終夔州郡丞物後邑人立祠虞山下春秋俎豆焉

祁大叅諱承燦字夷度令長洲時因武林鄭孔肩知余余執業請益公卽允必從容款曲每於羣衆中相譽家季正本試於郡公推烏愛拔之高等壬子余就京兆大比公爲南駕部郎握手歡甚乙卯余叨薦書公開尊稱慶又餞之江滸戊午偕計公聽調都門次君虎子雋於鄉舊契新知時時敘對及余宰福安虎子方司李與化世誼殷殷每詢起居不覺神往客歲陳

汝讓巡按上江余移書云寧太兵使本故人也晤間
為道感懷汝讓報札至乃知公已易簣經濟未究其
在後賢乎

過京兆諱庭訓別號成山平湖人余司教太平時公適
督學徽寧余隨班旅見公特揖之曰子江左名流乃
甘擁氈耶留余供事試場命設座堂下公舉業固有
本領閱卷如流有當意者輒以相質即去取猶豫必
叩余決之余所薦士俱列高等迨大比泄金陵余偕
計造別款坐慰勞復畀四金為贖皆異數也乙丑公

從田間起補閩憲長一泄事亟問龔福安何在而余
先以外艱歸矣踪跡疎睽感懷徒切不謂幽明遂異
路也

關學憲諱驥別號粵良南海人余庚申就教詣府繳憑
公已稔余平生蓋陳太史子壯實先致譽其明年例
當較士試卷山積余甫入謁公把臂笑曰君至事立
辦矣亟延入內署內署即謝元暉疊嶂樓也於時同

事者黃司李

尊素

賴宣城

良佐

涂涇縣

世業

張南陵

其孝

石太平

繫

皆虛心秉公而褒貶一以委余公侵

晨肅揖出治公事燈下閒來劇談併筐篋鎖鑰俱以相付且言去取殿最君悉主裁小弟但受成而已弟者平交之稱郡侯貶損如此真所謂忘形之誼矣又明年余下第復職奉檄署縣務文移朝報夕可民大沾惠無何擢廣西學憲別況如昨晤言難再不知何時得致生芻一束也

黃太僕諱尊素別號白安司李寧國氣岸嶽嶽貌視儕輩於余則敬信有加凡南臺行部於教職例有獎公擬獎語云舞劍夜呼風雨揮毫畫吐虹霓意甚愧之

庠有崔生者爲公觀風首拔士嘗於公所頌余教益公曰是非子所知予之師天下士枳棘棲鳳氣固干霄耳旣徵拜御史復手書推許乙丑偕計公方奉命出巡茶馬燕邸周旋遂作永別崇禎改元詔贈太僕寺卿

李公諱喬新字伯樛余母姨夫也余少時奇窮力不克從師有所結換輒造公請正公食之誨之猶子相勗間授以古今文籍及余稍成立卽介紹於諸先達不以凡兒目也壬子之役余於南都得一凶夢未幾訃

至嗚呼視吾猶子而視公未始猶父無德不報其謂
之何公理學深醇才名頗著與趙文毅瞿太僕輩頽
頽而數奇不第晚歲又依大乘翛然坐瞑語具邑乘
中

吳公諱士宏別號二泉弟士登別號季泉其母龔孺人
余同堂祖姑也吳在吾邑世以詩禮聞余年十五時
先伯延季泉公傅子而余附學焉公嘆賞以爲異才
無何公被惠州黃太守拉赴粵東於是二泉公代其
任賞嘆視公有加歲甲子余發憤入破山肄業季泉

公業稱尊宿矣反攜篋相就其醴信如此季泉公初
欲以姪女女余先大父辭之今內子陳氏則二泉公
所玉成也偃蹇世路奈九泉知己何

管僉憲諱志道字登之世稱之曰東溟先生先生倡三
教合一之說評隲聖賢提衡仙釋高自標置吾少也
妄私竊疑之及三十外讀六龍解不覺心折遂羣吾
黨執贄詣惕若齋於是先生老且病矣質疑問難則
忻然剖悉吾黨聞所未聞恨從遊晚余間請曰本也
何如先生曰女器也先生著述甚富宜槩加編纂刪

繁會粹後世必有知子雲者愧予謏劣未遑耳

諸尚寶諱壽賢別號景陽體貌魁碩意氣峭直不容於朝乃談藝授徒於吳門才雋從遊者甚衆予於文字外間請及地方利病公不以爲迂每向當事者刺刺陳說公居平不恒入闈廳事東設一卧榻予晨過卽命至榻前夕過則短檠清軟酒三四行卽子姪不與也乙卯報捷公特貽手書曰及門得雋者二人而偏以子爲喜子重科名豈科名重子哉切後以公論贈尚寶卿

繆宮詹諱昌期字當時故虞人也而寄籍江陰之東偏公垂髫時卽蜚聲藝林子輩莫不私淑其行卷至萬歷酉戌間文且三變其猶子尊素與予習一日偕真常王子執贄造謁於時受塵肄業者雲集予方規模先輩公弗善也而教愛有加庚子公舉於鄉至壬癸間復閱予文則大擊節而公浮沉公車倦甚壬子冬屬予假貨治裝扁舟夜話聞雞而別其明年公選入中秘又二年予廁名鄉書公資之北上甲子予入都公旣爲逆璫側目平昔知交裹足遠引子暉近如故

憶除夕共敘者獨予與李仲達耳時且推公南掌院
子夜夢公至一處北面易衣瞻梁間凡懸二扁其一
墨書白地曰勇退進士其一金書綠地曰輔導聖躬
無何旨下乃得閑住勇退之說既符矣予遷閩令造
江上言別公開尊劇談已又至虞一晤及予居閩忽
夢公科跣北行所衣青衣殊短會聞撫按覆勘意謂
不免於戍而已豈期終被逮耶恤典加贈宮詹宮詹
職主輔導造物者實默定之哉予雖誼屬師生每於
辨是非較臧否不覺掀髯抵几公但微哂曰此狂奴

故態也有傳在邑乘中茲不悉載尊素字太質才術
縱橫傾動時貴而叔姪道頗不同予以夙契始終無
牴牾每聚首但談少年釣遊事而已

吳叅軍諱士宏別號敬學予祖姑子也長家君半歲情
誼踰於骨肉予初生時家有外侮卽棲託公家既入
小學公繼紙繼筆過從則寘之卧內稍向進則獎愛
有加厥配李碩人亦視如猶子長君復清娶繆宮詹
女子次兒丈人也曩歲舉親喪墓中之石屬予誌且
銘焉

靜菴公諱應龍予從諸父也少與先君同學才俊相命
治舉業不售好讀老莊韓柳善鼓琴善戲謔負才好
奇予垂髫時公出藏墨爲贈且曰吾所蓄文籍當悉
以貽汝不貽吾兒也及予浮沉草莽每見間必勗之
曰無以益子但願子卑論儕俗耳至於今鵬翼鍛而
颺技窮將何以酬長者之望哉

附

范太公字永年別號仁元吳橋人稱太公者以座師父
也萬歷丙辰公起家明經筮仕通州判官予詣州叩

謁蒙殷殷倒屣別時勸予從京口路歸予竟挂帆南
下旣抵金山有急足持刺告回詢之乃公所密遣期
得余渡江信也累遷湖州別駕松江郡丞南工部郎
音問多落落迨崇禎己巳座師開府河南公年六十
乃致南寧府事誥封僉都御史是冬予赴河南候師
因留幕中不數日師提兵入援公款曲有加投轄至
再入春尚依依惜別卽公生平三命循牆德量溫雅
且童顏鬢髮予意其上壽可期也而遽止於此無乃
感時憂悒致傷尊懷耶

煙艇永懷卷之一

煙艇永懷卷之二

方應祥字孟旋西安人胸次磊落氣度汪洋初以選貢肄業金陵與徐元晦定交所刻冶城社草人人傳誦後遂領袖詞壇其與予相善亦以元晦之故當太夫人七袞時予撰壽序一通具述交誼孟旋感而佩焉丙辰借計同寓顯靈宮孟旋掄魁己未守部居京師時過予邸愛玩新稿以爲決第及報罷每請主司無日也庚申在南兵曹予取道北征疑予衣薄解絮袍衣之前途寒冽卒藉以濟乙丑丁太夫人艱予登堂

稽首丁卯夏予守制及暮偶至武林聞孟旋避喧湖
上往叩其扉見容色枯槁葷酒俱卻猶夜半秉燭爲
蘊輝上人序南華發覆予頗規之其明日持辦香束
帛詣予舟肅拜用以弔先子且言歸而卽吉當特叩
老伯几筵此香帛所以志也別甫半載遂無祿孟旋
與人交傾肝瀝膽卽之藹如嬰兒至是非所關侃侃
莫假借海內士大夫多傾嚮之昨夕夢君晤語容暫
而鬢鬢其殆神理之綿綿者耶

章時明字泰徵淳安人少負才藻予邑先達顧太常初

令淳安校士拔公居首後繇選貢除授邑丞以文學
飾吏治一日訪予於東臯示以所著明良錄屬爲序
言自是往來稠密公衙舍肅然予每過之輒開尊鼓
琴有抱牘至者必曰子姑去予糾貲援例公捐俸相
助會以督餉入都二三兄弟歌詩章餞之河澣比還
已擢承淳令則又迂之河澣丙辰大計公免覲予乘
便郵致詢已未公遣使約予晤於武林冗不克赴以
爲後會可期而公不逮矣馬鬣旣封銘辭未刻厥嗣
云礧石待我正恐拙筆不足爲故人重耳

後爲銘墓

宋鳳翔字羽皇嘉興人中王子北京解元文筆秀麗而
貌似河北儻父以氣節自負與虞山壇坫相望予至
嘉禾首謁譚太僕次卽訪羽皇羽皇過吳門其蟬聯
者必吾黨也累上公車不第聞其病目予往候之羽
皇曰兄聞二豎之說乎吾渡鶯脰湖見二豎從左右
肩入頭痛遂不可當今服工醫士藥一豎已出無奈
其一何也久之竟眇一目而其壽亦不永惜哉

沈守正字無回錢塘人治毛詩有聲與虞山詩社雅相
鼓吹癸卯之舉其本房徐士虞又予邑人也晤間輒

詢龔生近狀而實未覲面迨丙辰把臂意氣相許已
未兄中乙榜除黃巖署教予落落再北亦爲升斗計
燕市沽酒慷慨牢騷久之兄當遷秩受之語周忠介
曰無回才略沉雄畀以繁劇驥足斯展而時論終以
京秩爲優不于下僚無從表見當路甫知慕用而天
又奪之年可慨也已

魏忠節公諱大中別號廓園嘉善人公己酉鄉舉會試
時不受卷資予聞而異之庚申始識公於都門時爲
行人聲望矯矯寄居僧寺出行多徒步予持竹扇二

柄刻稿一冊爲贈公笑曰生平一介必却君乃破吾例耶明日貽酒一瓶米一斗蓋以示酬也性不赴宴一夕桐城約夜話屬予輩轉致卒堅辭焉奉使將別予與姚孟長攜尊詣寺中相餞公亦出草具共享其狷狹類此壬戌公已居要路予遂引嫌踪落落先是公手纂遼事圖說予實往復讎諮其後熊廷弼債事公等口角猶含糊意見微相左云

鄭圭初名之惠字孔肩錢塘人少負才藻予幼則習其行卷會遊寓武林淨慈寺君談經鄰舍是時倦於場

屋爲諸生祭酒矣一見交契予時刻擊楫篇君爲序首簡人之貢於廷司訓長興予乘便造訪登池塘小築竹樹娟娟琴書滿座採顧渚茶相餉適報遷平樂令君意不欲行予婉爲勸駕居平樂政聲大起直指奏其績擢左州知州蓋君非獨嫻於文惜爲資地所束耳

江鏐字保若錢塘人萬歷己未予寓京師太清宮宮西北隅有小蘭若則兄寓也初逢一僮秀慧詢之知爲保若侍兒名曰小香兄時自外歸各道姓氏因致夙

昔向慕之悰嗣是風清月朗過從甚暱下第後擬同
乞恩而兄患病不果其明年予至嘉禾兄後一日移
書道款恨踪跡之畸逮壬戌北上兄興致如昨而小
香已切近晤宋孔章知兄亦旣物故兄書法清逸嘗
爲予錄舅氏邵虎菴詩一卷見其筆其人猶可想也
費貞明字墨侯湖州人歲丙午予偕何子季穆遊武林
卜寓淨慈寺而墨侯寓相鄰持刺過訪且出稿見示
予歸時已於溪上送別及舴艋繞出湖汜聞有歌桃
花潭水深千尺者視之則墨侯也復拉過湖北厥明

分手越半載扁舟過虞其後率以爲常或棲遲旬月
乃去家在淩湖予嘗登其堂厥翁長厚人也津津感
銘厥子長與案等今殆出幼乎墨侯嘗爲予言少時
有奇遇蕭姓字溶溶美而慧惜不永年所遺七言歌
行一篇予以寄梅禹金俾載才女集中

石有恒字伯常黃梅人中丞楚陽公子也豐頤長鬚氣
度落落與之談經濟卽北敵南倭事若指諸掌庚申
春把臂都下歡若平生無何君除遂安令予就太平
學方是時遂安有劇盜路且梗或議紆徐觀變君倉

卒馳赴盜乃驚散初謁部使者見所鞠盜如干人心
疑其枉微諷部使部使以屬君果無辜也君釋爲耳
目盜悉就擒當道才之調繁長興縣諸相知尙以爲
人浮於地已酉冬予至京師周忠介在選部疏改君
爲子邑令時伯子確舉於鄉持君手書至謂南宮之
試緩於望子而急於望友也予報罷歸詣長興採茶
因過君衙舍秉燭劇談臨別出芥茶二筐曰吾官貲
惟此豈煩故人自採耶及賤累赴任取道四安君飭
輿馬送至宛陵未幾移劄札云我不戀長興而長興

士民戀我殆是業緣未幾果爲撫按懇留居半載而
難作故事元旦以四鼓嵩祝賊乘勢入縣先殺主簿
閹者請君速逃君不可賊遂擁君劫庫君曰庫銀皆
正供况貧民無能賠辦盍入吾衙請以私財贈耳盡
發匣中裘僅俸金七兩敝衣五件賊怒仍擁之窺庫
主藏吏則已堵截庫門復往劫獄犯抱君哭無一
肯走者于是天漸明賊要君送出城君笑曰送則送
矣何面目還見父老遂遇害事聞詔贈君光祿少卿
立祠歲祀予在宛陵信至且駭且慟曾吟輓詩三章

擬刻置祠畔不忍再過西州路云

謝兆申字耳伯邵武人性嗜書所至鈔謄忘倦遊貫往
往罄竭予所著快筆二卷特遊戲偶掇君亦亟索鈔
之留虞日吟詩見贈後援例入北雍倡詩文大社予
適偕計拉予同主盟予遜未遑也久之傳聞旅卒其
遺書散寄四方不知子姓能悉輦歸否

吳國華別號愛日寧德人予之遷福安令也公適繇大
行擢兵科給事中循例叩謁公執禮恭謹談地方利
病鑿鑿曾不及私比蒞事則又手書遠貽未幾以建

言削籍予往還會城輒經公宅其廳事不容旋馬予
至則草草開尊相對劇語公暫而頊望之知爲偉男
子予每告之曰世道否極必泰公何憂久約但須堅
忍得過無何予外艱訃至公辦香垂唁且曰臺下能
使士民如喪厥考卽囊不名一文錢所得多矣向蒙
贈堅忍二字亦願臺下勗之予深感佩焉迨聖政更
新羣英連茹特裁一緘相候而公已奄逝惜哉

繆仲與字醇之福安諸生也予初視篆時曹慶成爲予
言生孤情絕俗攻詩善畫久之生來謁退然若不勝

衣雖數數造請絕無私語但持吟稿一冊求序結廬
深山曰一瓢菴予守制西還便道托宿飛泉曲礪小
閣清齋恍然世外明發追隨三十里灑淚話別今年
秋蒼頭入閩予占三絕致遠懷而生乃物矣其弟仲
薦焚詩札於靈几前竟無嗣

蔣佳允字五芝灌陽人戊午秋大比嘉禾譚侯以司馬
郎典試拔兄爲第一人譚侯者予師也歲辛酉予過
白門兄方與仲恭季穆輩劇飲邂逅如故相訂北上
無何兄果造敝廬于是行同車止同邸報罷後依依

分手予有贈言指甲子爲期其後翰札往復稍聞兄
消渴而及期杳然入京遍訪知兄竟作古人矣其弟
嘉徵遵兄遺命見訪予潛焉屬筆作蔣解元傳嘉徵
以甲子舉所隨僕卽五芝故僕見予伏地嗚咽卽旁
觀且爲動色云

劉時俊別號勿所榮昌人萬歷己酉子與黃經甫輩決
科無名公居南刑科段公然在戶科共爲不平時時
敘議予輩卒得觀場不無知己之感其後公外補予
浮沉里巷至戊午偕計公方以行人司副典試還朝

又獲晤言意氣加浹庚申再入則公已陞南寶丞被
命宣諭朝鮮實有傅介子之興人競從與之子弗勸
也此議寢而蜀難起公遂以僕少贊畫竟致被誣賴
公論幸得昭雪自此無便相聞矣

張榜字賓王句曲人家於南都其文宏中肆外遠近傾
慕王子予應試白下方杜門肄業君糾宙合大社張
筵公所廣集名流拉予同主厥事予實未遑但一起
盟而已君記問該博晤間叩以經史輒疊疊剖悉但
不修行檢所至流連跌宕財盡乃去迨丙辰大北闈

中代人屬草方孟旋痛罵之予笑曰此賓王故態公
豈今日始知耶竟落魄旅歿聞其喪在東魯

仇夢台字泰符歙縣人同出范師之門初會時見其悃
悃恂恂君子人也丙辰己未偕計聚首情誼極洽庚
申同需次京邸乙丑兄擢戶部郎予遷福安令兄送
之南郊殷殷握手丙寅予守外艱兄權關臨清特遣
使信相唁於時魏仲雪以南銓休沐里中問來役無
書抵魏又問更有何事惟通候雲間陳公子公子者
孤兒也其誠心篤行類此已已移督淮安倉儲予馳

劄札通訊則奄逝矣然則乙丑之別遂長別耶

汪文言字士光歙縣人初爲縣胥後題授中書舍人僉邪構釁被廷杖百奉旨削籍爲民永不敘用人並榮之恨者不寘尋斃於獄先是君因正人道阻發憤北遊予晤之虞山舟中見其行李蕭蕭旣壯之亦憐之及予取次入都君遊公卿閒旣已言信行孚矣而無日不過從劇語每言別未嘗不愴然也君再下詔獄逆璫實借以羅織諸賢而君侃侃不撓僉王有病死者親覩其形聞其語嗟乎浮生同盡君人能聞而鬼

能厲又何羨曠下之瞑哉

湯賓尹字嘉賓宣城人世號之曰湯宣城在黨局中樹赤幟二十年望而畏之者比比是也予少習其文及署教太平縣則挾刺叩謁公欣然倒屣命酒劇敘每過輒然久不相見卽移尺牘問訊一日公改門牆牆上遠山映帶特延予飲酒酣叫曰淵孟淵孟爾試評我果何如人予笑曰明公人品雖復讐口亦不得謂之無才無情公撫几曰足矣嘗許先子壽言病不克就又嘗書抵閩藩司稱予才氣蓋代予則何敢當大

抵公性氣骯髒犯者必校而一種開爽之致磊落之略實有可慕用者水火既分彼此同盡悲夫厥弟近尹字季主行六公最愛其才品意趣交游兄弟互異而要不妨其友愛予每至郡季主必覓予蟬聯持觴分韻夜分忘倦會聞其卒亟往弔之家計蕭然遺孤尚幼予嘗囑公撫字今不知何若矣

王道新字鼎父儀真人贅於虞之張氏君庚子鄉舉行卷尖新可喜遊吾黨間頗暱雅善病容色不華已未之役聞中牘人皆稱賞竟報罷行貲復爲黠奴罄竊

子慰藉之曰君患病不愈耳他何足患會有鼓盆之戚神氣益銷損辛酉冬道經儀真訪君已坳蓋膏肓之難攻非一日矣

曹履端字慶成當塗人爲福寧州同知予之莅福安也君署縣篆交代時一見莫逆自是處異鄉若同室君雖職簿書而飭清齋儲佳釀予公務至州必留連燕笑偕入省會則把臂夷猶其間相成相勗之情有人所不及知者予丁家艱署篆又屬君渡河餞別見士民攀轅號泣君喟嘆曰吾之知兄尚不如地方知兄

之深耳瀕別又囑兒子易曰尊公治狀若此而微聞
左轄懷私憾宜謹備之迨戊辰大計之前君抱病歸
從武林寄一手書灑灑數百言其末云公論既定左
轄無奈兄何矣弟賤疴幸痊期以明春訪安道子方
屈指相遲會錢子受之歸自當塗語予曰慶成念兄
居然病體殆似不復予亟遣劄候之而兄已瞑今年
十月始得持生芻一束告虔兄尚在淺土門庭寂寂
伯氏光祿公留飲其脣子在侍夜分送予登舟江流
湯湯明月掩映淒清恍若見故人也兄有李姬隨侍

閩中麗而慧一日予晨詣兄言別姬曉粧畢方共朝
饗兄送予出西關而姬暴卒予嘗賦輓詩三章慰之
其悒悒損神半坐此

左光斗別號滄嶼後更曰浮邱桐城人當子識公時公
已爲御史默默經營世道矣或枉騎或招飲所商皆
世道臧否人材得失之故絕無尋常寒暄及公執朝
權其扶植要路予所稱許者必與焉以此感其見信
也公雅談星命予欲就教公止之曰君之官當與吾
等何乃棲棲冷局於乎公不能知已之凶終又安能

知予之不冷哉

顧端文公諱憲成字叔時世稱之曰涇陽先生予自少誦習行卷又景慕道風而未始執贄一日隨繆宮詹謁之涇上見予所刻擊楫篇以爲可教其後公過虞山予輩過東林每於講堂周旋公氣度溫醇卽之似不息者及辨論是非乃覺侃侃已酉錄遺公薦予於當事予未嘗相干亦不令予聞也其憐才惜士類如此

蔣錫疇字九敘武進人乙卯之舉與予同門先此雖未

識面而於文字互知名相得懽甚己未兄以歲暮方至京師氣體憔悴予深訝之自後予碌碌升斗踪跡疎濶傳聞凶訃不禁惻愴吟詩一章志感

尹嘉賓字孔昭江陰人予初至江陰維舟柳岸見岸上衡門不閉內有軒楹壁多題句而案無凡帙心竊異之李至清曰此尹孔昭齋也明日試訪之其人踈弛負氣在諸生聲籍籍與之飲忘形爾汝乙卯予入都君方爲中書舍人持酒勞予於邸舍己未再入則己量擢兵曹憤懣不自得予笑曰君薄尙書郎獨不念

我僕僕公車耶因開尊暢飲酒酣慷慨旁若無人也者予下第擬乞恩故事舉子非三科不得乞君以囑何宗伯予乃得之其後予落落擁羶君陞楚學憲卒於官又二年始得登堂致弔堂卽軒楹故址而規制則華敞矣至清字超無相識時髮纒覆額而雄談爽氣已與先生並行善作驢鳴嘗共飲鵝鼻嘴上嘴者江中浮島也放聲大作江水如沸後爲頭陀又更爲武弁湯義仍輩多愛之卒以好奇自斃

沈應奎別號湛源武進人由乙科仕至南光祿少卿正氣磊落膂力絕人袖中懷銅尺一光鋸黯黯語及僉壬便擬奮擊之豪貴多敬憚焉及汲引後學則又藹然和易予之仰交公最晚而蒙獎愛頗深一日予晨謁公巡撫毛某舟過晉陵鄉紳拉公往拜公曰故人在座未暇也予欲訪諸友公期之飯諸友多留宴者予告以故莫不色駭蓋公素簡澹故餉客遂爲異聞比至則清蔬濁醪直貧士之供而已回想清風於今

神企

李應昇字仲達江陰人封公號見復故與予習一夕飲

於公家兄時年十三適往候舅氏公出兄文示予予曰此進士才也歲甲寅兄操舟訪予東臯遂入破龍社社約既定二三兄弟載酒汎月華灑兄沉醉潦倒上樓時都無所省乙卯同舉於鄉書刺猶用晚字予謝不敢當明年兄成進士除南康節推予規之曰君無縱飲待召入吏部醉未晚耳兄報云捨却覆頭一醉又於何處覓吏部耶既而徵拜御史甲子予入京清流多已被譴兄意氣自若然過從慰藉者獨吾輩一二人耳未幾削奪以行予策馬相送兄解銀帶爲贈及予匆匆入閩未遑言別其明年殞於詔獄知不知俱傷悼焉兄天性孝友行誼醇篤非直立朝靖共而已其堂兄曰奕茂字爾承鴻臚序班古心古貌敬而愛我非緣仲達之故也

郭勳別號希暘江陰人生而沈深溫雅好稱形家言與真常王子相陰陽觀流泉朝夕不倦予先大父物故君特垂唁予懇而留之今官蕩新阡君所鑿定也君且死囑其子曰大事以諮龔淵孟小事以諮樊慰山慰山名位性行忠信邇年亦切矣

朱本淳字伯還華亭人少負才藻其文宏博中窾浮沉
鬢序而息氣不衰素與吾黨習兄過虞山吾黨過雲
間各如赴家然壬子應試南都兄謂予技必售逮乙
卯再同事兄自顧遲暮牢騷不平報捷之夜痛哭仆
地及聞予售則不覺欣慰予北征時未聞凶信忽於
兗州邸舍夢兄晤言且託以後事覺而占一律志之
丙辰下第還詣靈几前焚其詩仆地云云其郎君所
述也

陳所聞字無聲華亭人乙卯同房也貌豐腴性溫厚人
與之交真如飲醇醪丙辰秋嘗登兄之堂稚子出揖
肌肉玉雪可愛己未燕邸朝夕相切磨兄觀政吏部
予留乞恩則復同寓靈濟宮聚首良久明年予除教
職又明年兄除部郎自此音問寥寥後聞兄丁艱歸
又聞臥疴豈意其遂不起哉客自雲間來者詢兄家
門知稚子列膠庠文名奕奕矣

徐文任字元晦太倉人生而倜儻任俠東南交道俊與
廚兄殆兼之四方名流歸兄者如鳥望林兄捐貲急
難殆無虛日與孟旋受之季穆及予不佞尤相暱愛

兄有季子欲娶予次女次女實已心許顧氏季穆遂以女女焉孟旋無子兄贈之妾受之置貳兄則飭園亭俾有寧寢凡此皆其平平者耳賦性高亢意所不可卽豪貴必逆折之予間爲規諷兄弟弗顧也歲甲子予在仙源得一凶夢覺而飲泣其明日又泣丙子曰夢可認真耶何妄自苦未幾受之訊至夢之夕乃易簪之夕也嗚呼元晦亡而交道渙湖海之士每語及未有不淚零者豈但吾輩哉

周忠介公諱順昌別號蓼洲長洲人公初節推福州藩臬有邪正異品者公與正合與邪忤然操如冰蘖邪亦無奈之何予聞而心儀之任滿歸吳遂相結納其居第秋隘宦囊惟蘭蕙三四盆布衣青鞋出則徒步至地方利病則對當道鑿鑿不休聲望籍甚猶記庚申秋予別桐城出都桐城曰貴鄉銓部將屬誰予曰聞屬周某桐城又曰公與相信否予曰交頗深桐城領之無何擢主事吏部公謂予居此官者例當沉默吾性諤諤當奈何予曰沉默自是俗套未聞陸莊簡拘此套也公將兩蒼頭入署日用僅費七文錢書幣

一切攢絕壬戌之役數與周旋但覺爽爽于霄耳乙丑夏孟長治喪河澣巡撫毛某雖弔不誠公面誚之又有一東魯巡撫某者郡人也故與孟長暱而道弟代弔公呼其僕唾罵焉是時予方有闔行公在舟中誚別子諷曰危行言孫古道宜然君不念太剛則折耶公曰吾筮仕之初不知何以與某合而與某忤人固各有神也且禍福有命吾任吾性而已居半載而難作子奔訃還家憑公棺有邦國盡瘁之感爾日璫欲方張親朋尙有裹足不赴弔者要之羅難諸賢俱處

局內公獨從局外觸藩氣格尤倬所以匹夫發憤緹騎就殪顏佩韋輩雖勇得公而名始彰也

周宗建字季侯吳江人少與兄安期制義齊名而公早捷宦遊予未之識也已未春予寓都城東隅公突挾刺相尋自此往還殊洽庚申考選休沐予在安期齋頭公亟過存及報謁見其借屋樓城則嚮慕有加公才性通敏拘方者初頗疑之在臺中建白偏卓罕聞詔獄就斃公獨慘酷以其首論客氏云

鄭允驥字閑孟嘉定人文心秀慧性度溫醇矮而肥其

背尤豐相知戲呼之曰鄭駝酒態淋漓每共飲愈酣
愈暢一日予棲虎邱竹林君適夜集業不任下樓矣
而固欲登舟及扶至階下則又欲上樓勸之臥不臥
但倚壁笑云若曹謂我醉耶多見其不知量耳侍兒
俱為絕倒

三

徐允祿字汝廉嘉定人博學宏詞王逸季輩莫不推讓
之君亦岸然自雄而里選多不利予少習君小題行
卷私心嚮往及君館於虞邑相識恨晚也君落落穆
穆行已在不夷不惠之間食學官餼廩需次當貢會

被黜詹事錢受之告學使孫公曰徐某似伏櫪老驥
宜其五花色衰然以文則諸生不足以行則教職有
餘學使爰拔置優等而君竟無祿知者惜之

侯震陽別號吳觀嘉定人公以甲午鄉舉生豫瞻三兄
弟並才雋予與諸兄同歲遊庠相識於金閭河澣予
自顧形穢而諸兄以齒莊視予每邂逅郡邑問公喬
梓靡靡如鳳引雛予謬廁顏行每承歡洽久之公成
進士為大行而容色枯瘁晤間常勸之調治己未公
考選在京豫瞻偕計于是予且再戰再北公不以為

怯而情誼加厚居無何拔居掖垣建言被譴至聖政
昭明賜環詔下而公不逮矣予兀守草土今年夏大
祥方得登堂稽顙諸兄正以是日卽吉流光奄忽可
勝嘆乎

李流芳字長蘅嘉定人丙午舉於鄉其制義清婉多姿
而非其所好恒以丹青翰墨自娛士林識不識爭傾
慕之所至但借二二三同調清尊雅集語及俗夫姓名
輒攢眉蹙鼻惟恐或洩予素習兄而丙辰之役燕京
同寓其周旋最久先是夢兄以硯示我綠質而磬形

屬予作磬硯銘覺後捉筆書之用以相寄至是果有
硯在行笥宛如夢中所見云客歲仲夏聞兄嘔血受
之同操舟詣其別墅兄神明不衰諧謔間作自辰至
戊乃別且曰吾體度以七月全旺虞山倚棹其在八
月乎不謂一豎侵尋秋而冬冬而春竟不起也兄殯
凡百日而予始往酌梨酒茂林精舍風景不殊人琴
之慟何能已已嗟乎當世知兄以風雅此非知之深
者猶憶同寓時婁東一顯宦貽之卷貲顯官者仲氏
大史同籍年誼故薄兄嚴却其貲且草尺一牘刺刺

誦讓焉載觀近作有關情世事惟餘笑入耳新聞不
受驚之句其胸懷從可窺矣

趙宦光別號凡夫本婁東人因先墓在寒山遂移家卜
築焉造訪之初在萬歷辰巳間見其疏鑿泉石魚鳥
翳然素饌清尊名流雲集君氣韻蒼雅似圖畫中人
善作古篆運筆如飛予每尋天池諸峰必先憩青霞
樹君有興則籃輿與偕自凡夫謝世而山靈寂寞併
遊屐亦稀矣

洞聞上人名法乘本吳江李氏子初叅紫柏禪師師器
許之其掩關二峰時予年十六七每造詣輒信宿關
房其後移錫天目又移維摩最後主教破山寺上人
道貌充腴喜爲山居詩所至搜奇石作供蓋有支道
林之風致者也

一看者虎邱東院僧佚其名法號悟宗自署關門曰一
看人故以此稱之禁足山中垂三十年惟憇山法師
過訪送之登舟纜一破例耳居室傾覆上人方跌坐
木龕龕忽自移數丈嘗夢異人示句曰海湧峰頭月
梧桐樹下僧上人屬客續成多不愜予曰何不云峰

頭月一片樹下影千層上人撫几稱善

普門不知何許人初受戒於五臺山獲有識兆尋訪至
黃山遂卓錫焉先創文殊院形勝陡絕已乃卜殊砂
菴遺址營建慈光寺適李太后頒賜四面金像慈光
者敕額也上人雅自負高往往傲睨尊顯予未至寺
一里見小沙彌持茗相逆詢何以知客來答曰普公
疇昔之夜偶感異夢知必有德士見臨耳及投方丈
懼若平生爲予道開山緣起甚悉是時門廡堂奧略
備而正殿尙未肇工其言曰殿高而門四闕費須三
四萬金恐願力未克竟吾姑具規模而徐候緣法功
不必出自一已也但異日者梓人難於措手已將細
材造規製貽之子試往觀嘆其思之功而慮之遠也
是夕留宿禪房次日乃別

附

南兵部侍郎元仗徐公諱必達嘉興人也萬歷午未間
繇南銓陞光祿寺丞疏論大造黃冊當綜覈戶口不
宜沿襲虛套余心韙之後因講學過虞側侍丰儀毅
然偉人也迨天啟壬戌公以操院進兵侍余時署教

太平蒙獎借過當屬者來令崇德情誼加篤辛未大計嘉秀俱被察公忽移一書云每車騎弭節西水僻處林中絕少音耗致不獲時望顏色殊以為歎今天下吏弊極矣小民日坐湯火中誰為察吏安民者令人痛哭流涕所幸頭上有天猶似不遺吾赤正不知繼者何似求其孜孜汲汲時時為窮閭起念者獨老父母耳中心好之真不啻口出正商之一二知己如虞乾鵬岳石鍾者不欲以枳棲鳳而譚仲兄意適與愚合隨以數行附譚行李北去屬當事急為地方計

又擬叩賢公祖商之而兩日適為風寒所侵又腰痛特甚以此暫止然不能一刻忘也總之小人有心惟力是視在老父母則須每意於盤根錯節中做得一分便是一分真實學問也恃在道誼至愛敢併以此言進照之此書蓋公絕筆故全載焉余感其意亟請函丈起居公猶扶掖送別不數日遂逝

徐大相別號明衡生於江右之安義歲庚申為國子博士三疏劾權璫盧受直聲大震偶在姚孟長座中相識其明日君顧余於靈濟宮自此歡洽之極嘗占一

律贈之無何遷兵部郎改入吏部驗封司予嘗教大平縣時方有急而魏璫之燄已熾君爲邪黨所忌因奏薛蕙卹典遂矯詔切責君拂衣歸余用前韻寄訊其後聞問杳隔璫敗後起居銓部典銓者爲王承光欲用史葬高捷爲君所持承光狺狺相向君會以家艱解任余服闋赴補中途把臂不覺語之劇夜之分且追誦拙句以爲先見此已巳冬也名節相勗天涯比鄰而頃乃傳得凶信不容不爲世道痛惜矣

魏士淳字元臯江西南昌人故司空莊靖公任子肄業

南雍歲已酉予與定交介而合之者元晦也壬子乙卯兄與余遞舉於南公車攜手意氣相許兄狀貌頗偉每以無子爲慮余奔馳鞅掌久不相聞頃入南比部同舍郎有諱士冲者爲兄堂弟叩之則兄乙丑且物故遺孤三人以天道言之成立殆可期矣

彭遵亮字明甫溧陽人萬歷已酉與尹孔昭同舉於鄉丙辰之役余偕寓顯靈宮孔昭實爲作合嗣後游從頗暱嘗於燕中見君佩刀甚銳叩之云是溧陽鐵工所鑄半年後君購一把相遺頃遇潘學博忽得君凶

問嗚呼人生如寄容如刀之長在乎

婁堅字子柔嘉定人少負才名王弇州父子重其博雅
既而厭薄制舉以詩文自娛尤精鍾王書法傲睨元
宰遇相知忻然命筆否者雖重賄不屑也需次歲貢
絕不表宅年六十慶弔槩不出境客有造訪者清言
亶亶超然塵表崇禎改元余舟次練川公緩步就晤
旁觀大驚蓋是時年踰古稀養病不出者半載矣癸
酉傳得凶訃老成凋謝爲之愴然

朱陞宣字德升長洲人壬子舉於鄉與周忠介公同社

同科後遂訂姻盟忠介被逮德升方在制白衣冠周
旋於吳民鼓噪之時或勸稍避形迹兄屹如也逆璫
實聞其名懾不敢肆虐人謂天實佑善豈意其竟不
永年哉兄與余以名節相慕每偕計輒過從深談平
居落落而已崇禎乙亥吏部采觀風疏上聞詔贈兄
翰林待詔其殆文起之力歟

龔方中字仲和嘉定人厥翁諱錫爵仕至粵西方伯仲
和狀貌可似傖父而文筆清雅向與余通宗以兄弟
稱所居壘石種花翰墨自娛崇禎甲戌坳於家侯峒

曾云年正六十峒會者其甥也

姚希孟字孟長居臯伯通里中少負才名余里選殊偃蹇相得甚懽余過吳門輒宿絳趺堂而兄嘗館於余邑已酉錄科不利兄憤憤拉余與黃經甫王季和同叩南臺省臨期僅得入場又一科而兄舉又一科而余舉已未同上公車兄選爲庶吉士次年余入京就教每寢食兄邸壬戌之役若繆若魏若周諸賢時時共集余旣罷歸傳聞乞假寄之以詩兄得詩揭諸臥內乙丑太夫人歿兄亦遭逆璫削奪扶櫬金閭余入

舟相唁文閣學周忠介在焉嗣後禍且不測璫敗召起典外制洊歷宮詹余以服闋候補蟬聯極洽無何爲忌者所中鑄秩掌南院接手書悒悒不自得余留部候考會聞兄患沉疴及余到南而兄已歸吳矣溘然謝世志業全未遂也

文震孟初名從鼎鄉舉後以字行更字文起中歲自號澁持狀貌魁梧雙眉直豎望而知其卓犖端人也憶余結交之初兄尙居北城雖浮沉公車而名節籍甚楊忠烈公每抵郡必造請焉已而移家金閭齋頭饒

廣池高柳門無雜賓每過從輒摘蔬小飲嘯詠終朝
澹若世外己未共寓燕市東南兄以筆誤不得入二
場時兄已九上春官余勸之折節小草兄默默歸銳
思借一壬戌廷對遂擢魁首兄雅意不在溫飽感憤
時事上書罷歸無何逆璫燄發削奪里居會周忠介
被逮吳兒噪擊詔使兄且岌岌波及比還朝旋疏逆
璫之嚙忠介者癸甲間列在講筵常以君子小人立
論情詞忱爽上為改容傾耳羣邪重足而立又謂光
廟實錄訛舛侃侃廷諍上真兄奏於御座久之突諭

閣臣稱兄忠讜閣有主邪議者授意同黨陰竄玉音
為言路所摘兄累疏引疾不允余考選見擯兄持斗
酒餞之南郊別未幾而遂大拜拜未幾而遂去國海
內且喜且驚而兄之口占則云素心原不染風塵流
落風塵惜此身今日縱魚歸大壑桃花流水隔千春
此其胸次豈與捐廉鮮恥戀戀黃扉者同日道哉無
疾奄逝山頽梁壞之愴匪獨一知交矣

毛湛字修之厥翁亦鄉貢宦遊而所遺田僅九十畝至
君則又損大半掌教婺源遷南國學余之結交則國

學時也以同舉乙卯稱年弟兄傾蓋如故次第遷刑部郎而又同列西班笑談愈暝今年三月初君患腋癰殊劇已而疽發於背望日余特往晤之君憑几對談不異疇昔越一日遂瞑君雅好著述遺稿滿篋易簣時誦紫柏所贈偈語其妻永訣君笑曰吾得偈力此心曠然身家事不足聞矣

煙艇永懷卷之二

煙艇永懷卷之三

周名金字南甫參藩木之族子也生而敏慧絕羣和光埋照子結髮讀書西城不屑交里中兒友人朱君從稱予於兄兄一日見過就岳祠下班荆而語大相賞得兄內行醇謹然雅嗜謳歌間逐狎邪遊吹簫浮白用以爲樂其文雄暢有氣而精神不耐攻苦自少善病病得之酒且內家計酷貧復不能供藥餌萬歷癸卯予小試冠軍是時兄疾已劇聞之喜色又聞諸生辱郡守兄於榻上頓足曰君從必爲離羅之雉矣已

而果然易簀時嗚咽語予輩云名金不孝弗克終事
吾父而宗祀復絕諸君子即憐而檢我金其忍即安
乎死後必以裸葬能使金留身後名者必淵孟也予
輩遂以大布之衣以卒之年葬虞山東麓居久之忽
夢持弓挾矢覲面相呼予有紀夢一絕

顧耿光字介明憲副一江公子也倜儻有智策以俠烈
聞於四方萬歷甲午予欲入山下帷而苦於無貲乃
偕伯龍徐子懷刺謁君君素未之識也慨然授之館
授之餐雖以他事故未嘗一年淹然此情此誼古人

難之矣子每過補溪輒造其家造則留連日夕採美
釣鮮清尊共適忽一日晤君於東城把臂登樓神氣
矯矯而自言將逝不數日果卒予亟往弔其柩上鐫
有治命三載前所題也別有傳在邑乘中

金希閔字孝夫與先大父善予幼日造公家公則命題
課業時年已六十餘授筆評校猶不減時髦先大父
為余言公懷奇負氣海忠介公均徭法其所條上也
王儼字真常家香山之陰去敝廬可數里初抵敝廬時
年未弱冠互相欣賞其後同心蘭臭出入必偕予稍

顧世法而兄傲然絕俗對俗子則疑眸卷舌意自颺
去舍我而外所善者惟何子孝穆顧子又善而已文
心秀慧援筆葩流然不恒屬稿其尺牘古雋綺麗予
哀得一卷爲蠹蝕盡豈兄之靈不欲遺藻人間耶兄
故有臙疾而諸藥雜進得一方輒服一方又酷嗜形
家言陟嶽降原馳驅勞勩及營道林阡葬父病且不
支矣居無何遂瞑年三十有二無子予勉爲經紀後
事耐葬厥考昭穴擬爲樹一碣尙未遑耳兄有叔諱
國號雲芝其人樸誠循禮雲芝歿香山道予遂絕跡

焉

焉覺別號劔里賦性樸茂爲諸生祭酒祖遺多縹帙閑
戶批玩雖其子欲讀亦買別本授之公故與予習歲
戊戌同在玉峯候學使者信予旣見擯而徜徉自若
公大詫異曰吾閱世久誰則有雅量若君者哉亟呼
酒慰藉且飲且歎以爲難能公六十時予有贈言特
爲致感至於今緬懷老成如公者真不再得矣

趙祖美字叔度文毅公仲子丰采翩翩在儕偶中若雞
羣之鶴爲王敬美婿與同伯尤莫逆其行蹤半寄太

倉急難讓夷不屑屑家人生產凡親朋燕會兄一至則舉座生風庚戌夏予聞兄養病太倉扁舟往視兄着巾強起呼童煎新茶相餉茶至手不任舉甌予心危之已而歸虞調治予在何平仲鄉居夜得夢兆亟拉平仲到城兄病果不可起矣比歲屑予士履職任中書覃恩贈兄如子官人謂有天道云 叔度之兄曰琦美別號元度性嗜典籍所哀聚凡數萬卷絕不以借人其在鄉邦許借者僅三友而予居其一以父澤仕至刑部員外郎

翁吏部諱愈祥字兆和君性度雅飭所謂溫溫恭人無子有女弟子何尊其壻也戊戌第進士三任縣令自清豐歸持桑落酒相贈予之嘗北酒始此庚戌春擢稽勳司主事戒行予輩祖道胥江之上聯舟促膝談人才世道每至夜分津津靡倦別後予甫抵邑而凶問歛至衆初未信急走其家而君已小檢哲人乍萎異哉

顧雲鴻字朗仲生而矜名行尙氣節予少時爲豪宦所侮君儼然惠存之故已嚮慕其人至是益感佩焉及

君修業密娛軒予寓鄰舍時時持制義相質君悉心
商訂所裨益居多君累上公車北歸每談河渠漕運
事以爲惟予可語也旣而營藤溪別業益與俗流遠
載酒過從者二三同氣而已賁志奄逝吾黨謀所以
誄君者予曰文章有神交有道一語足以槩君矣經
稿世所常誦予則彙而序之邑乘中別有傳

瞿同卿諱汝稷字元立世所稱洞觀先生者是也予幼
時聞公絕婚事心竊慕之比長公已宦遊至謝政歸
乃得音謁清風雅範可挹可師於書無所不窺隨叩

輒應兼工小楷請之書欣然捉筆後繇辰州守擢運
使予送別時薄效一得之慮公不以爲狂而歛容稱
謝後陞太僕卿致仕而天遽奪之令人有餘慕焉

邵兵部諱鑿字麟武北虞先生子也其人魁梧磊落不
屑屑鈇槩而詩文秀色可餐氣岸高亢杜門嘯傲殆
似君平棄世世棄君平者壬寅冬公偕繆仲醇阻冰
唐市予適肄業馬驚菴但往晤仲醇而刺不及公其
明日公見過戲語仲醇曰人言邵郎傲此君之傲不
更甚耶未幾折柬招予於山陰別墅持螯命酒賦樂

哉新相知之句嗣是往還酬唱率以為常要未嘗見
公有他客也公所刻北虞集子實出鈔本佐成之每
擬輯公遺稿一冊傳後而副墨散佚惜哉

沈大叅諱應科字獻夫視予年長不啻以倍季穆丈人
也其重予初以季穆故久之相信漸深公言動皆有
矩度延余與厥孫其學居平晤對談宦蹟歷歷恒謂
我曰公氣度必貴但不知為何官耳執禮恭謹雖朝
夕周旋而迎送務出外門今之達尊求其長厚如公
者殆不得而見之矣

陳大叅諱禹謨字錫元莊靖公子少負才名記覽該博
中歲方得舉於北闈仕至貴州叅議卒追論勦苗功
加贈叅政予與公論交時衿猶未青每見拙作輒語
館賓項君曰謹鈔而善藏之居則聚首出則移書情
好殊暱公無胤子喪至今殯於堂昨偶過其庭庭中
雙松半菱壁間雙松讚幸存公手筆也苦無麥舟可
助奈何

何世滋字無生其人博雅娟秀避世牆東長齋佞佛但
釀名酒自娛予與季穆跌宕為狂或夜半排戶或強

拉登臨兄雖逡巡勉應而意態促促則又引滿以慰之及分韻賦詩兄輒先成所著戲論一卷詼諧玩世予既序而刻之有北運誌二卷藏於家有書也
朱元德別號仁泉家與子鄰攻小兒醫痘科尤精予家子弟多藉以生而君有子輒天所謂盧醫不自醫者耶其人孝友忠信知者俱追悼之

許士廉別號左海其配與予妻姊妹也婦翁歿予家締姻君實主之語岳母平氏曰丈人雅欲覓快婿此其人矣君多智好奇孤立行一意遇親朋絕不似世俗

炎涼於余有伯仲壘篋之誼戊午夏予束裝北征君股間作楚以爲偶然耳夜泊胥江夢君枕肱而臥其言曰不謂末疾乃能困人處分後事其明日亟遣信使君果易簣嗜人情相遠夫烏知夢語之非永訣而執手之非行路耶君之從弟曰時省別號箕山王寅癸卯間予肄業君家箕山已爲孝廉時花洗竹楚楚有致伺予暇卽出名酒拉飲其量可三四斗己未予在京師箕山以餘干令入計元旦冒雪見過留之飲乃謝不能益風塵之損神如此而萍踪亦從此睽隔

瞿純仁字元初所居別業曰拂水山房初延伯樗李公
爲師子就李公問業相識伊始旣而情好漸深出入
共事每過山房把酒論文於焉逍遙必爲旬日之淹
兄文筆縱橫凌厲儕輩晚歲豪氣不除蘭焚膏煎天
年不永受之誌墓擬諸方干孤魂及第之慨有以也
張英別號洪溪家在予里之東本窶人子力田逐什一
而欲以詩書課其子于里選不利落落幽居君忽於
歲首登堂肅拜持卮酒爲壽以幼兒付託予愕然諾
之予徜徉山水輒挈弟子偕行君過而不問其見信

如此行已多可稱嘗爲撰張處士傳

吳汝第字及甫生而坦夷有度家貧性侈予每規之兄
雖善吾言而不能用初署教江右乙卯歲暮入都行
資告匱予寓顯靈宮兄遂下鄰其右及知交小有贈
遺卽張宴徧速同袍戊午分考雲南橐中土物被盜
攫去所僅存者亟以餉客其性然也累陞國子監丞
毒鍾於頰竟不治家計蕭然

徐待任字廷葵生長望族而淹雅近人仕至沔陽州守
卒於官其將之沔陽也予以緩急告兄乞諸其鄰而

濟之此晚近所難雖謂之直可矣

瞿參藩諱汝說字星卿早歲杜門修業業成聲譽鵠起予幼則誦習其文迨識公時公已鄉舉後謝政林居而予與長君起田同籍公虛懷貶損不以執禮自居雖時值養病聞予至必延入函丈釀得佳酒未嘗不分貽也公性嗜花竹子覓得異桃核公分而藝之先子方開七袞公手持觴爲祝且曰願此桃速茂年年採其實以介眉壽予再拜稱謝又六載先子棄代而公竟先作古人覩彼天天轉堪增感耳

邵昌鋤字耕夫濂之父也有學有識中歲棄去儒冠嘯傲公卿間莫不重而愛之與予爲忘年交予嘗有贈言云道情屬邦彥德輝冠鄉耆公揭之座隅以爲知己蓋公慨士風囂凌每望後賢砥柱而不知者僅視爲通脫也公之達生暗合禪理晚景極迤邐而神不爲損辛酉冬予將北征聞公養病內寢已閱三月試往告別從者云主公且出予駭曰吾但請入視耳及出則巾履儼然坐談良久詢曰足下何時歸予對以春夏之交曰審爾不及再晤矣予曰先生善頤養何

遽至是公微笑曰生必有死古之頤養者皆安在哉
比南還果已無祿仲子洛述公瞑時強力雖蒲團老
宿有不逮云 濂字茂齊才情卓朗東南詞壇推執
牛耳累戰京兆不利意且頹然已酉決科冠軍密持
闈中牘示予予賞嘆不置比撤棘卷果擬元而復失
之白此鬱鬱消渴先公而卒

范紹祖別號承吾廉憲之孫別駕之子予先大母之從
姪也別駕文弱素為強宗惡戚所凌破於南贛是時
公甫弱冠人且視為几上肉公立捐一二萬金並寘

宗戚於法已乃入貲為光祿署丞及罷宦歸杜門却
掃里黨間獨與予善予襄祖父母大事卜兆適在公
中田度富室無棄產之理而馬鬣又俗所鄭重不得
已試微探之公慨然許諾仍廉其值久之予第三女
滿生公即襁褓聘為孫媳女雖殤而姻好則篤矣公
方大檢累世豐贖頓為豪強攫盡眷屬飄泊吳閫僅
遺假山一座而豪強之攫未已移石時鬼聲繞石號
又憑一夫怒罵其辭氣儼然公也若公所謂生氣凜
凜者非耶

陳以敬字仲孺博聞強記趙文毅輩並相崇重四方顯
宦多延傅子姓里居無幾予伺其居輒迎憩齋頭公
口期期談古今事不倦古文辭淹雅有則予倡義欲
爲買田贍老而錢少參拉往楚中竟旅卒

范學博諱樂善字君爲家官祿塘之灣與敝廬南北相
望公壯負才名病肺幾殆已而強起闢聽雨軒督課
子姪他姓亦有從遊問業者予年十七公屬相知者
介而召之遂操觚往公語諸友曰此非汝曹侶亦非
一鄉士也公固執友自此世交益敦乙卯公分教義

興聞南闈捷報吟二詩見貽後掌教石城忽挂冠歸
其壽終時予薄遊未遑執紼念之耿耿

巖郡守諱澂字道澈文靖公任子致政林居托興風雅
予輩過從公每款坐小飲或鼓琴動操其見訪但青
鞋緩步一奚奴持刺以隨人多訾其太嗇而於以砭
紕袴豪奢之習未必非對症良方也

顧太僕諱大章字伯欽與仲恭孿生少時隨太常宦遊
比歸技業已成伯樗李公授經兄所予輩耦俱徵逐
歲丙申同應試荆溪其明年兄遂鄉舉迨丁未成進

士則意氣久孚矣王子予援例入雍兄捐金相助戊午予再上公車兄在比部默默有所經營辛酉冬兄以典試還朝過大河訂約予入都主於其署壬戌調武庫司遙聞邪黨側目寄之以詩兄請告歸每移密劄商略且囑太宰以國學處我而應山格之甲子復調祠祭司仲冬朔予夢附兄舟而行行甚倉忙但見眷屬而不見兄其明晨適晤言未解所謂泊時局大變兄以陝西憲副行燕邸敘談黯然分袂不久被逮予及兄眷屬同時抵家而兩人無覩面之期則前夢

悉符造物者實豫定之豈邪黨真能死兄哉

何允泓字季穆淮王傅左泉先生厥考也生十有七年爲萬歷壬寅嘉禾譚侯校士兄名第二而予糠粃在前自此把臂定交兄識高學博非予比倫而神情孚契有踰膠漆明年王傅歿里黨構訟經時乃解爰賦秋懷二十律見志已而主盟破龍才名橫鶩在庠試輒居首遷隸國學縉紳賢達且以時務相諮非但四方之士爭附也綜覈古今淹貫而洞達仲恭嘗曰通天地人之謂儒若何季穆者庶幾無愧於儒乎急人

之難不遺餘力而臭味苟殊則白眼時露逆燄方張時幾爲讐戚所中憤懣之衷有未易一二對人言者乙丑夏與兄聯舟過沙溪夜深言別及歸敝里兒子平從城居來傳兄微疴予亟理棹趨視中途小阻兄遲予訣而予不逮肉猶未寒留一紙處分身後蓋端坐而書書畢卽瞑此可以觀兄去來之際矣居平唱和多不勝錄初定交時贈言有金閨倘愆期州郡可永譽之句豈予之識耶乙卯北征得兄五言七首慷慨悽婉讀者擬諸白馬王彪之什已乎李穆竟何爲

乎子美云臨餐吐更食常恐違撫孤後死者殆滋愧耳

王字春字季和予弱冠時偕顧子又善肄業塔院兄時常過談其後浮沉鬢宮同應小試每秉燭伊唔務期刻畫者必吾二人也兄嫺四六綺語小題行卷時髦傳誦緣故出妻忽有受戒雲棲之事予輩強之歸然而禪心勇猛無問方內方外凡解紛急難雖摩頂放踵不辭久之精已銷亡而勞瘁如故予在宛陵嘗寄詩諷之於時兄憤賦籍溷淆吏胥得以爲奸悉力爬

搔務清弊竇迨予赴閩時兄委頓伏枕猶諄諄以利濟爲囑旣而曰喘如少延閩中土物無所須但須乳腐耳一夕予夢屋角容光中着兄隻眼心竊疑之馳告翁光澤光澤信至則知兄化去矣奔訃小間持乳腐奠之亦昔人挂劍之義云

繆希雍字仲醇故宦家子孤貧刻勵初教授予里中裹足讀書里中人莫之識也久之揣摩成出遊賢豪間規畫世務所至傾動兼通青烏肘後諸書卽專門皆遜讓之而公所重在氣節曰此吾之餘緒耳初移家

陽羨又徙長興又徙金壇歲必兩度還里祭掃先墓其到虞亟尋子輩快叙不通俗子繆與龔誼屬葭莩當教授時先大父獨物色之

李允熙字文孺一字緝夫伯樛公長郎也齒視予少數歲予及見其襁褓時年十三張令君集義真案旁面課大加獎賞遊庠未幾遂食縣官餼廩邑之治禮經者並宗之試京兆累報罷志業不遂而又嗜形家言與真常同癖矻矻勞瘁竟歿天年先是余過玉峰君方應院試予見其色墨心頗憂之試之晨猶強起億

而中止比歸誤服大黃奄逝予在城幸得與其含檢
悲夫母姨遇我甚厚君雖中表情似同胞而今已矣
君鼻闕而好謳酒酣嗚嗚人比之洛生詠伯樛公尙
在淺土疇昔之夜夢君經紀葬事其素所結念也
顧應璠字子孚其考大叅瑞菴公故長者晚歲頗知子
兄丰神美秀文筆雄贍而持躬檢抑惴惴攢眉在里
黨無雜交其所事惟顧子仲恭盛子九容所友則季
和季穆及予而已客歲負笈訪友僑寓臨清發憤下
帷誓不舉不歸而竟以此旅歿其如命何

何萼字千里弟芾字百里予友平仲之子淮王傅之孫
歲甲辰兄弟俱中角平仲挈以屬予資性敏而潛駿
駿精進並列青衿萼喜讀史其文婉雅中窅芾之文
典而裁居然闡墨書法亦道勁事予類諸父不但經
師也相繼歿芾子嘗著二何子傳每經曩時書屋輒
爲愴然

孫榮祖別號龍城居尤涇之上有術能召仙其法封一
密室候琴聲鳴啟視所叩者示以答處或在竹中或
在龍眼中剖之墨跡如新而不知其所從入段令公

然有內典疑義疏爲一冊君屬令緘固用縣印箝蓋
收寘衙齋約以某日開開則詮註詳悉矣王元美輩
俱暱愛焉所居蒔藥草植名花予與至每叩其扉元
談清供有煙霞氣晚歲爲頑姪所搆其妾宋氏控當
道段令在南垣實護持之宋名大亮本錢水部校書
謝君學佛有莫將離別恨混入海潮聲之句

附

周炳別號似虞醫士也性好客酒尊茶白楚楚有致每
逢中秋輒操舟到虎邱雖冗極不廢如此者六七十

度其九十誕辰余爲文壽之又三年而歿

盛文琳字九容戊午發解南畿其制舉義極苦心壬戌
報罷涕泗交頤間語余曰臣力竭矣命不我與矣自
此入鄉躬畊絕不與輕薄孝廉爲伍至於公正發憤
則不避嫌怨吾黨方引爲聲氣而一旦無祿亦氣運
一所不容耶

瞿式耒字起周文懿之孫元立之子懷奇負氣初治舉
子業熊廷弼督學時星卿適爲楚學憲互有關白星
卿旣爲式耒地矣式耒謂詭遇不義遂棄去舉業別

一攻丹青久之產廢無聊乃寄身光祿稍遷涪州判官
竟坳於蜀其遺翰亦寥寥以生前自矜重也

徐化鯉字伯龍娶於朱爲余表姊弱冠時共業城中於
時兄已攻制義予草草遠不逮也歲甲午兄旣遊庠
相與肄業山陰予稍有悟入及予稍知名而兄且棄
儒從賈矣余掌教宛陵分符仙源俱拉兄偕行其制
行篤古知者雖信服而所知多不合年餘六十一疾
奄逝自兄坳而古人不可復見矣

陳國華號珍凡萬歷甲戌進士也生而詼諧自喜仕至

廣州知府邑中凡縉紳公會先生在則舉坐笑口俱
開一日邀余荷亭共飲大相驚詫以爲酒品莫余若
者自是見輒盡歡平兒與其會孫遊先生則又與平
爲忘年交崇禎甲戌年終齒方九十曾孫亦有子矣
張勉字幼安家秦坡礪之下少而失怙善書其天性也
諧謔多致真常又善輩並與之暱入其齋卽命酒痛
飲晚節余以薄遊多睽隔豈謂兄之遽逝哉幸兒曹
得與執紼之役耳

乾隆庚寅春日七十一叟王嗣賢繼仁氏錄

煙艇永懷卷之三

終

煙艇永懷跋


昔先君子愛蓄異書凡有關掌故及名賢秘錄世鮮傳本者必手鈔之日八千言今歲校書照曠閣攜帶是編主人愛而梓之竊幸先志之賴以不墜也

嘉慶戊辰立夏日莪伊王文棫謹書

是編爲吾鄉淵孟先生所作先生令崇德時力鋤強梗觸忤時相及改御史復忤巨璫卒以降調歸崇禎甲申之變北向長號不食卒所著有浪泊集甲乙集松窗快筆今皆罕見是編所錄皆名賢巨儒爲古今不可磨滅

之人昔賢云欲考人品當觀所交接之人于茲益信考
邑乘分煙艇漁筆永懷筆潤爲二錄茲合爲一未免互
異云

嘉慶著雍執徐歲六月後學張海鵬識



聖